

Morning Dogri (NSD) National News Bulletin 20-05-2024

- लोकसभा चुनाव 2024 के 5में गेड़ तैहत् 6 राज्यें ते दऊं केन्द्र शासत प्रदेशें व 49एं पार्लिमानी हल्के लेई इसलै वोट पाए जा'रदे न।
- ओडिशा च अज्ज बडलै 7 बजे थमां 5एं संसदीय हल्के ते 35एं विधानसभा सीटें लेई मतदान प्रक्रिया चला'रदी ऐ।
- ईरान के सुप्रीम लीडर अली खामीनी होरें लोकें गी अपील कीती जे ओह ईरानी राष्ट्रपति इब्राहिम रायसी के हैलीकाप्टर पर सुआर होरने के सुरक्षत परतौने लेई प्रार्थना करन। ईरानी हैलीकाप्टर नै हार्ड लैंडिंग कीती ही ते अजे तक लपता ऐ। प्रधानमंत्री नरेन्द्र मोदी होरें एहदे पर चिंता बुज्जी ऐ।
- पैरा बैडमिंटन खडारी सुकांत कदम, तरुण ते सुहास नै पैरिस च होने आले पैरा ओलंपिक लेई अपनी थाहर पक्की करी लैती ऐ।
- फ्रेंच ओपन 2024 टैनिस् प्रतियोगिता अज्ज पैरिस के स्टेड रोलैंड च शुरू होआ करदी ऐ।

<><><><><><>

Polling

लोकसभा चुनाव के 5में गेड़ तैहत् अज्ज 6एं राज्यें ते 2 केन्द्र शासत प्रदेशें दिएं 49एं पार्लिमानी हल्के च इसलै वोट पाए जा'रदे न। इस गेड़ तैहत् उत्तर प्रदेश दिएं 14, महाराष्ट्र दिएं 13, पच्छिम बंगाल दिएं 7, ओडिशा ते बिहार दिएं 5-5, झारखंड दिएं 3 ते जम्मू कश्मीर ते लद्दाख दी इक-इक पार्लिमानी सीटें लेई चुनाव करोआए जा'रदे न। मतदान बडलै 7 बजे शुरू होआ हा ते एह संजा 6 बजे तोड़ी चलोग। चुनाव के इस गेड़ तैहत् जेहदे प्रमुख मेदवारें दी किस्मती दा फैसला होना ऐ, उंदे च बीजेपी के नेता ते केन्द्री मंत्री राजनाथ सिंह, पियूष गोयल, स्मृति ईरानी, केपैक्स लीडर राहुल गांधी ते के.एल.शर्मा। नैशनल कांग्रेस के उमर अब्दुल्ला ते एलजेपी के चिराग पासवान शामिल न। चुनाव गी बेहतर ढंगे सिर करोआने लेई 94 जहार 732एं मतदान केन्द्रें पर 9 लख 47 जहार मतदान अधिकारी तैनात कीते गेदे न।

अज्ज ओडिशा विधानसभा दे 35एं असेंबली हल्के लेई बी वोट पोआए जा'रदे न। इस गेड़ तैह्त 8 करोड़ 95 लक्ख मतदाताएं चा 4 करोड़ 69 लक्ख मर्द मतदाता, 4 करोड़ 26 लक्ख महिला मतदाता ते 5 ज्हार 409 ट्रांसजेंडर मतदाता वोट पाने दे अपने अधिकार दा इस्तेमाल करगंन।

<><><><><><>

Odisha Polling

ओडिशा च अज्ज बडलै 6 बजे 5एं संसदीय हल्के ते 35एं असेंबली हल्के लेई चुनां प्रक्रिया शुरू कीती गई। लोकें च चुनाएं गी लेइयै बड़ा मता उत्साह ते जोश दिक्खने गी लब्भा'रदा ऐ ते मतदाता लम्बिएं-लम्बिएं रींगें च खड़ोते दे न। पार्लिमानी चुनाएं दे 5में गेड़ तैह्त कंथमाल, सुंडागढ़, बारगढ़, बलनगीर ते अस्का संसदीय हल्के लेई चुनां करोआए जा'रदे न। इनें 5एं सीटें लेई 40 मेदवार चुनां मैदान च न। असेंबली दिएं 35एं सीटें लेई 265 मेदवार चुनां मैदान च न। अज्ज 79 लक्ख 70 ज्हार मतदाता 4 ज्हार 162एं मतदान केन्द्रें च वोट पाने दे अपने अधिकार दा इस्तेमाल करगंन। सब्बने मतदान केन्द्रें च 20 प्रतिशत संवेदनशील जां मती संवेदनशील न। 5एं लोकसभा चुनां हल्के लेई सीएपीएफ दियां 102 कंपनियां तैनात कीतियां गेदियां न।

<><><><><><>

Ladakh

संघ शासत लद्दाख च 2019 च दफा 370 त्रुटने मगरा एह् पैहले मुख्ख चुनां न। बीजेपी, इंडियन नैशनल कांग्रेस ते इक आजाद मेदवार बश्कार त्रिकोणी मकाबला ऐ। लद्दाख च 1 लक्ख 84 ज्हार 804 मतदाता वोट पाने दे अपने अधिकार दा इस्तेमाल करगंन। लद्दाख पार्लिमानी हल्का क्षेत्रफल दे स्हाबै मुख्खै दा सब्बने शा बड्डा संसदीय हल्का ऐ। एह्दे तैह्त दूर-दरेड़े दियां मुश्कल पहुंच आलियां थाहरां बी शामिल न। प्रशासन नै मतदान लेई 579 मतदान केन्द्र स्थापत कीते दे न जिंदे च इक सियाचिन ग्लेशियर दे आदार कैप च वारशी ग्रां च इक परिवार दे 5एं जिएं लेई बने दा मतदान केन्द्र बी शामिल ऐ। इस मतदान केन्द्र समुंद्री सतह थमां 15 ज्हार 520 फुट दी उंचाई पर भारत-चीन बन्ने पर अनली-फू थाहर बी बनाया गेदा ऐ।

1967 तक लद्दाख, गांदरबल संसदीय चुनां हल्के दा हिस्सा रेआ ते मगरा हदबंदी दे बाद 13में आम चुनाएं दरान इस इक्कली सीटे लेई मतदान करोआया गोआ हा। इसलै चलारदे पार्लिमानी चुनां 14में आम चुनां न।

<><><><><><>

UP-Poll

उत्तर प्रदेश च अज्ज बडलै 14एं लोकसभा हल्के लेई 28 जहार 688एं मतदान केन्द्रें च वोट पाने आली प्रक्रिया शुरू कीती गई। बड़ी सख्त गर्मी दे खदशे गी ध्यानै च रखदे होई प्रशासन ते चुनां आयोग नै राजधानी लखनऊ च बनकदे इंतजाम कीते दे न।

<><><><><><>

PM-Bihar

प्रधानमंत्री ते बीजेपी दे वरिष्ठ नेता नरेन्द्र मोदी होर अज्जै थमां बिहार दे दऊं दिनें दे दौर पर रौहगंन। ओह अज्ज संजा पटना पुज्जगंन ते दऊं बक्ख-बक्ख कार्यक्रमें च शामिल होंगन। उंदा राजेन्द्र नगर स्थित पार्टी दे वरिष्ठ नेता सुशील कुमार शिंदे, जिंदा पिछले दिनें काल होई गोआ, उंदे घर जाइयै बसोस करने ते सुर्गवासी लीडर गी श्रद्धांजलि भेंट करने दा कार्यक्रम ऐ। सूत्रें मूजब नरेन्द्र मोदी पटना च बीजेपी दे राज्य मुख्यालय दा दौरा करियै पार्टी कार्जकर्ताएं कन्नै बैठक बी लांगन। कल उंदा एनडीए दे मेदवारें दे समर्थन च पूर्वी चंपारण दे मोतिहारी ते सीवान संसदीय सीट दे गोरिया कोठी च दऊं जनसभाएं गी संबोधत करगंन। प्रधानमंत्री हुंदे बिहार दौरे गी दिक्खदे होई पटना, मोतिहारी ते सीवान च सुरक्षा बधाई दित्ती गई ऐ।

<><><><><><>

Iran Helicopter

हैलीकाप्टर हादसे दे बाद लापता ईरान दे राष्ट्रपति इब्राहिम रायसी हुंदा पता लाने लेई यूरोपी-संघ नै अपनी तुरत कारवाई आली मैपिंग सेवा गी सक्रिय करी दित्ता ऐ। संकट प्रबंधन सरबंधी यूरोप दे विशेष कमीशनर होरें इस सेवा गी सक्रिय करी देने दा ऐलान कीता ऐ।

कॉर्पोरेट इमरजेंसी मैनेजमेंट सर्विस, यूरोपी आयोग दे माली समर्थन कन्ने चलने आली सेवा ऐ जेह्डी मनुखी संकट दी सूरतै च बेल्ले सिर ते स्टीक भूगोलिक जानकारी मुहइया करांदी ऐ। ईरान नै राष्ट्रपति हुंदे हैलीकाप्टर दी खोज च तुर्कि कोला बी मदद दी अपील कीती ऐ। तुर्किए 6 गडिडयां ते 32 बचावकर्मी भेजा'रदा ऐ जेह्डे पहाडी इलाकें ते होर कठन हालात च खोज तुपाई दे कम्में दे माहिर न। कल आपात स्थिति च हार्ड लैंडिंग दे बाद ईरानी राष्ट्रपति हुंदे अजें तगर कोई अतापता नेई लग्गी सकेआ ऐ।

<><><><><><>

Badminton

भारत दे प्रमुख पैरा शटलर सुकांत कदम, तरुण ते सुहास नै पैरिस च होने आले पैरा लिपिक्स लेई अपनी थाहर पक्की करी लैती ऐ। सुकांत कदम पैहली बारी बैडमिंटन दे पैरालिपिक्स च हिस्सा लैगन। उंदी श्रेणी मर्दे दी एसएल-4 ऐ। एह ओ श्रेणी ऐ जेह्दे च खडारिण दे पैरें च कुसै चाल्ली दी अछमता दा विकार होंदा ऐ। तरुण ते सुहास नै बी इस्सै श्रेणी लेई क्वालीफाई कीता ऐ।

<><><><><><>

French Open

फ्रेंच ओपन 2024 टेनिस प्रतियोगिता अज्ज पैरिस दे स्टेड रोलैंड गैरोस च शुरू होआ'रदा ऐ। ब'रे दे दुए ग्रैंड स्लैम च मुख् झॉ दे मैच 26 मई कोला शुरू होंगन। भारत दे स्टार खडारी सुमित नागल नै मर्दे दे इक्कले इक्कले मकाबले दे मुख् झॉ च अपनी थाहर पक्की करी लैती दी ऐ। ओह 2019 च प्रजनेश गुणेश्वरन दे बाद फ्रेंच ओपन दे मुख् झॉ लेई क्वालीफाई करने आले पैहले भारती पुरुष खडारी न।

<><><><><><>

IPL

आईपीएल च कल दऊं मैच खेड्डे गे। रातीं गोवाहाटी दे बारसापारा क्रिकेट स्टेडियम च राजस्थान रॉयल्स ते कोलकाता नाईट राईडर्स बश्कार मैच बरखा कारण रद्द करना पेआ। 3 घेंटे 30 मिंट लेट होने कारण पैहले मैच गी 7एं ओवरें दा करने दा फैसला लैता गेआ। कोलकाता नै टॉस बी जित्ती लैता ते पैहले गेंदबाजी करने दा फैसला लैता पर उसलै बरखा इक बारी परतियै शुरू होई गई ते मैच रद्द घोषत करी दित्ता गेआ। दौनें टीमें गी इक इक अंक दित्ता गेआ। एहदे शा पैहले दिने आले मैच जेहड़ा हैदराबाद दे राजीव गांधी इंटरनैशनल स्टेडियम च खेड्डेआ गेआ ओहदे च सनराइजर्स हैदराबाद नै पंजाब किंग्स गी 4 विकटें कन्नै हराई दित्ता। जित्त लेई लोडचदे 215 रंज दे लक्ष्य दा पिच्छा करदे होई हैदराबाद नै 19 ओवर ते इक गेंद खेड्डियै मैच अपने नां करी लैता। इक ताजा स्थिति मूजब आईपीएल दी अंक तालिका च कोलकाता नाईट राईडर्स 19 अंके कन्नै पैहले नंबरै पर 17 अंके कन्नै सनराइजर्स हैदराबाद दुए, 16 अंक लेइयै राजस्थान रॉयल्स त्रीय नंबरै उप्पर ऐ।

<><><><><><>